

dere Einzüäumung absonderlich wircket/ vnd was ein Pferd nach Beschaffenheit seines Mauls haben wil/ vnd so sie ohngefähr zwey oder drey Ursachen herbey bringen/ beduncket es Sie genug zu seyn/ Ich aber sage/ daß es ist/ als wann ein Blinder von denen Farben redet.

Es möchten vielleicht etliche vorgeben/ ob woln sie nicht vielerley Ursachen anzuführen wissen/ vnterlassen sie doch nicht/ die Pferd/ wie es sich geziemet/ zuzäumen: Diesen gieb ich zur Antwort/ daß nothwendig vnter so vielen Zäumungen/ die sie versuchen/ ungeschick eine sich finden muß/ die dem Pferd etwas taugt/ daher ist es sehr nützlich/ daß man die Ursachen/ warumben man eines vnter andern Mundstück brauchet/ verstehe/ weilen man zum öfftern mit vielerley Zäumung nichts anders zu weeg bringet/ als daß neben andern schädlichen Pössen/ man auch das Maul verderbet vnd zerreiſset/ vnd ist hernach viel schwärer etwas gutes aufzurichten/ sonderlich wann ein solches Pferd in den Gewalt/ vnd vnter die Händt eines Reiters kommet/ der die Sache auch nit besser verstehet/ deme fällt es alsdann viel beschwerlicher es einzuzäumen/ als ihme anfänglich gewesen wäre.

Dahero sage ich/ daß man einem Pferd ein solches Gebiß vnd Mundstück einlege/ daß sich auff seines Mauls Art schicket/ vnd also mit dieser ersten/ oder zum meisten mit der andern Einzüäumung alles ausrichte/ dann so man darüber schreiten thäte/ wäre solches eine Anzeigung/ daß derselbe der es erstlich eingezäumt/ nicht gründlich verstanden hat/ was dem Pferd tauglich gewesen/ oder was die Sachen/ die er ins Werck gerichtet/ thun können.

Wann derowegen einer im Zweifel ist/ was für eine Zäumung einem Pferd tauget/ solle man ihme anfänglich das allerlindeste Gebiß so seyn kan/ gebrauchen/ darmit recht vnd wol abzunehmen/ was dem Pferd am nützlichst/ vnd tauglichsten seye/ auff daß man es folgendß nach Art vnd Natur seines Mauls recht zäumen könne.

Schließlich rathe ich/ daß alles wol bedächtlich/ vnd mit wolgegründten Ursachen beschehe/ vnd daß man keines Weegß denen jenigen nachfolge/ welche an statt des Sehens nur greiffen wollen/ darvon aber weder Ehr noch Nutzen haben.

### Das III. Capitel.

#### Wie man in Zäumung der Follen oder jungen Pferde verfahren soll.

**I**r mißgefällt vber die Massen/ wann man den jungen Pferden gar zu frühe das Nasband wegnimmet/ wie dieser Zeit viel zu thun pflegen/ welches vielmahls der Pferd verderben/ ein Ursache ist/ dann ein Nasband/ es seye von Stricken/ Leder oder von Eisen/ thut gute Wirkung/ nemblich daß es über sich hebet/ oder niederziehet/ wie auch den Kopff vnd Hals einrichtet vnd stät macht/ so wol gerad fürwarts/ als in denen Wendungen/ vnd erhält das Maul vnd